

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
MINISTARSTVO UNUTRAŠNJIH POSLOVA
MINISTARSTVO UNUTARNJIH POSLOVA
Z E N I C A

Broj: 08-04/1-02-_____/18

Dana: 04. 07. 2018. godine

Postupajući po Zaključku Skupštine Zeničko-dobojskog kantona broj: 01-02-10661/18 od 29. 06. 2018. godine, a koji se odnosi na obavljanje javne rasprave o usvojenom Nacrtu Zakona o unutrašnjim poslovima Zeničko-dobojskog kantona, Ministarstvo unutrašnjih poslova Zeničko-dobojskog kantona donosi:

*PLAN JAVNE RASPRAVE
o Nacrtu Zakona o unutrašnjim poslovima Zeničko-dobojskog kantona*

I

Programom rada Skupštine i Vlade Zeničko-dobojskog kantona za 2017. godinu predviđeno je donošenje Zakona o unutrašnjim poslovima Zeničko-dobojskog kantona (u daljem tekstu: Zakon). U planiranom roku programska aktivnost nije realizovana ali je Ministarstvo unutrašnjih poslova radilo na utvrđivanju ovog teksta. Realizacija programa započeta je u mjesecu februaru tekuće godine.

Vlada i Skupština Zeničko-dobojskog kantona su podržale predloženi tekst Nacrta i nakon održane sjednice Skupštine Kantona u cilju poboljšanja teksta Nacrta Zakona o unutrašnjim poslovima Zeničko-dobojskog kantona i eventualnih sugestija i prijedloga predložile provođenje javne rasprave svih zainteresovanih subjekata.

Osnovni razlozi za donošenje Zakona o unutrašnjim poslovima Zeničko-dobojskog kantona su sljedeći:

S obzirom da je osnovni tekst Zakona o unutrašnjim poslovima Zeničko-dobojskog kantona donesen 1997. godine, da je isti nekoliko puta mijenjan i dopunjavan, da su pojedine odredbe ovog Zakona nametnute od strane Visokog predstavnika u BiH koje su u daljoj skupštinskoj proceduri usvojene u istom tekstu, te da su u međuvremenu doneseni i drugi zakoni koji su istu materiju regulisali na drugačiji način kao i činjenicu da su pojedine odredbe prestale da važe, stekli su se uslovi za donošenje novog teksta Zakona.

Ministarstva unutrašnjih poslova u Federaciji Bosne i Hercegovine su u ranijem periodu u saradnji sa predstavnicima međunarodne zajednice (OHR-a, EUPM-a i ICITAP-a) održala niz radno – konsultativnih sastanaka na kojima su usaglašavani stavovi u izradi nacrta Zakona i nakon toga su u Federaciji BiH doneseni Zakon o unutrašnjim poslovima Federacije BiH, Tuzlanskom kantonu, Bosansko podrinjskom, Unsko sanskom i Kantonu Sarajevo, koji su bili osnov za predlaganje teksta Nacrta ovog zakona.

Cilj javne rasprave je da se o predloženim rješenjima upoznaju predstavnici svih zainteresovanih subjekata sa područja općina i grada Zenice, odnosno Kantona, uz sudjelovanje predstavnika javnog informisanja kako bi se građani odnosno šira javnost upoznali sa odredbama Nacrta Zakona i eventualno poboljšali tekst Zakona o unutrašnjim poslovima Zeničko-dobojskog kantona.

Od javne rasprave se očekuje doprinos svih zainteresovanih u poboljšanju teksta Nacrta Zakona koji će Vlada Zeničko-dobojskog kantona kao predlagač dostaviti Skupštini Kantona u vidu Prijedloga Zakona na razmatranje odnosno usvajanje.

II

Javna rasprava obaviti će se na sastancima u sjedištu općina na području Zeničko-dobojskog kantona i Gradu Zenica koji se održavaju u sljedećim terminima:

1. Općina Olovo	17. 07. 2018. godine u 11:00 sati,
2. Općina Vareš	17. 07. 2018. godine u 11:00 sati
3. Općina Breza	17. 07. 2018. godine u 11:00 sati,
4. Općina Kakanj	17. 07. 2018. godine u 11:00 sati,
5. Općina Visoko	17. 07. 2018. godine u 11:00 sati,
6. Općina Maglaj	16. 07. 2018. godine u 11:00 sati,
7. Općina Žepče	16. 07. 2018. godine u 11:00 sati,
8. Općina Zavidovići	16. 07. 2018. godine u 11:00 sati,
9. Općina Tešanj	16. 07. 2018. godine u 11:00 sati,
10. Grad Zenica	18. 07. 2018. godine u 11:00 sati,
11. Općina Doboj jug	16. 07. 2018. godine u 11:00 sati,
12. Općina Usora	16. 07. 2018. godine u 11:00 sati.

Sastanke u općinama, odnosno Gradu Zenica prema gore predloženom rasporedu blagovremeno će zakazati službe načelnika općina, odnosno gradonačelnika Grada Zenica, i sekretari općinskih vijeća i sekretar Gradskog vijeća Zenica koji će osigurati prostore koji omogućuju prijem dovoljnog broja osoba za održavanje javne rasprave, kao i osigurati prisustvo subjekata iz stava I ovog Plana kao i odrediti lice – zapisničara zaduženog za dostavu sumiranih rezultata sa javne rasprave Ministarstvu unutrašnjih poslova Zeničko-dobojskog kantona kao obrađivaču teksta Zakona.

Na svim navedenim sastancima Ministarstvo unutrašnjih poslova Zeničko-dobojskog kantona će osigurati prisustvo svojih predstavnika radi vođenja javne rasprave, a sve sa ciljem lakšeg sumiranja javne rasprave o Nacrtu Zakona o unutrašnjim poslovima Zeničko-dobojskog kantona u svih jedanaest općina sa područja Kantona i Gradu Zenica.

III

Za izvršenje ovog Plana odgovorno je Ministarstvo unutrašnjih poslova Zeničko-dobojskog kantona.

IV

Ministarstvo unutrašnjih poslova je na svojoj službenoj web stranici dana 04.07.2018.godine, objavilo tekst Nacrta Zakona o unutrašnjim poslovima Zeničko-dobojskog

kantona kako bi se zainteresovane stranke na vrijeme mogle upoznati sa tekstem i dati svoj doprinos na poboljšanju teksta Zakona.

M I N I S T A R

Nikola Arsenić